

22
ist / vnd few frische negelein. Item / nym negelein /
few die wol / vnd legz ynn ein weis tüchlein / vnd thu
es ynn die scham wie du kanst.

Fur die reuden odder kretze.

Wer ausgebrochen sey / der neme alant vnd alt
schmer / mischs zusamen / vnd salb dich darmit beim
fewer / doch seud den alant vor ynn essig / Odder seud
Kettig ynn wasser / wenn du erschwitz / vnd aus der
badstuben gehen wilt / so wasch dich darmit am letz-
ten.

Ein andere Salben.

Nym ein lot Schwefels / zwey lot Lorber / stoss
wol vnd mischs vntereinander / nym denn vier lot alt
schmer / zu lass das ynn einem heselein / vnd thu sie
griepen daruon / vnd so das Schmer wol ergangen vnd
heys ist / so thu den Schwefel vnd Lorber darunter /
vnd lass also gestehen / wo du vn sauber bist / da salbe
dich mit dem / vnd sonderlich so du schlaffen wilt ge-
hen.

Die reuden an den henden zuuertreiben.

Wasch sie oft aus einem fliessenden bronn / vnd las
sie selbs trucken werden / Odder nym einen schaum der
sich samlet ynn einem fliessenden fallenden wasser.

Ein Bad fur die Reuden.

Nym Allantwurtz zwey odder drey pfund / vnd ein
vierteil eines achteils saltz / auch Franwitpeerschuss-
ling ein guten püsschel / seud das ynn einem Kessel / des
ersten ein pfund Allantwurtz / des saltz ein teil / der
schussling auch ein teil / seud daruon drey odder vier
Kessel vol / Darnach lege widder ein anders als vor /
vnd las das wasser wol dran einsieden / vnd bade dar-
ynnen drey tag vnd nacht / doch nym regen odder flie-
send wasser / es heylt schon. Item / Strupelwurtz
schneid.